

Bärner Goldys Mittelland

Tageswanderung 2019

Am Mittwoch, 18. Juni het d'Margrit näbscht dr ganze Organisation ou no grad bim Petrus schöns Wätter besteut und drum hetts a Hufe Lüt am Bahnhof gha, wo ou hei wöue ga wandere. Mini Angscht, i findi di Goldys gar nid unter so viü Lüt, isch vergäbe gsi. Schliesslech glänzt ja ds Gold respektive die fröleche Gsichter vo de Goldys! Rächtzigtig si di 15 Aagmäudete binenang gsi.

Gemäss Programm simer i Zug Richtig Baselland gstige. Ds Liestal heimer i ds Postouto gwächslet u si nach Reigoldswil witergafahre. Nachhär isch es mit zügigem Schritt zur Talstation vo dr Gondelbahn gange. Dank dr Rosmarie, wo mir het zuesproche i chönnis gmüetlech näh, hani de doch no gäbig möge in e Gondle iigstige und alli si mir sicher i dr Bärgstation glandet. Zersch hei mir aber no üs müesse aklimatisiere mit emene Kaffee. Es isch rächt warm gsi wöus doch scho glii uf di heissischi Zyt am Mittag zue gange-n-isch.

Wie vorgseh isch es i 2 Gruppe witergange. Di längeri Wanderig hei 10 gmacht di Chürzeri 5. I ha zu dene ghört wo nume churz witer zumene Brätliplatz si gange. Dert si Schulchinder ifrig am Brätle gsi. Ds Zwöite hei mir no es Plätzli uf emene Holzbank gfunde di andere 3 hei sich im Gras nidergla. Vo dene Schüler hei mir öppis Nöis glehrt: mi cha nämlech Mashmellows ane Holzspiess tue u überem Füür brätle u de schlussändlech no ässe!! U de d'Serelat ersch nach öppe dr 5. Mashmellow ! Mir hei de scho lieber üsers Picknick gnosse!

D'Ussicht vo dert isch gäge Basler (?) Jura gange, aber i ha ke Ahnig gha wie die Hüggle heisse. Gmüetlech simer wider zum Restaurant zrüg u hei dr Durscht glöschet. Allmählech si o die vo dr grössere Wanderig zrüg cho u hei verzellt, dass es doch no rächt stotzig über Stock u Stei gange sig. Meh oder weniger alli hei no es Dessert gnosse u si de früsch gscherkt dr churz Wäg zur Bärgstation gange.

Wie vo dr Margrit i dr Usschribig erwähnt, isch es sogar mügglech pär Trotinett i ds Tal abe z'fahre. Das hei sech ihre 3 nid la näh u si fasch gleichzeitig wie mir imene elegante Boge a dr Talstation aacho. Vo dert simer no einisch a dene schöne Gärten mit blühende Rose u Pfingstrose verbi gange u hei bi dr Busstation nume churz gwartet um wider nach Liestal zrüg z'fahre. Pünktlech wie immer isch der Zug cho u mir hei üs uf de reservierte Plätz chönne usruie. Wie immer hetts im Zug a Gsprächstoff nid gfäut u mir si äbeso pünktlech u zfride ds Bärn acho

Mir danke dr Margrit für d'Organisation und mir hei mit dere Wanderig wider a-n-andere Egge vo dr Schwiz chönne lehre kenne.

Ilse Weyeneth

